

**Maurise RIPERT**  
*Mèstre en Gai sabé dóu Felibrige*  
**CONTE E RACONTE**  
**d'aièr e d'aro**

Pourtissoun

*En souvenènço de Michèu Froumage*

Ero vièi quand l'ai couneigu. Amave de lou vèire veni s'asseta dins l'ataié de mi gènt, mèmbe de l'oustau mounto courduravon. Mai, subre-tout, me fasié gau, i vihado d'antan ounte s'ignouravon televesioun e meme radiò, de l'ausi counta d'istòri de sa jouinesso, d'auvèri de sis annado de travai, e de cascareleto que nous fasièn estrassa de rire.

Devenuè lèu-lèu, un famihié encò dóu nostre e fuguère countènt de l'agué desenant emé nautre lou divèndre à l'aiòli. D'aiours, quouro ma maire anonciavo:

— Vau metre li cese à trempa!

Rebacavo subran:

— Oh, qu'acò es bon, Tereso!

E ma bravo Tereso de maire ié replicavo:

— Eh bè, as qu'à veni deman à miejour, n'en faren la soupo e pièi l'ensalado!

Nous pagavo 'mé soun prouvençau d'elèi, lou sourgènt de si raconte èro inagoutable. Lou badave e beviéu si paraulo.

Brave Michèu, soulitari e desmuni, mai riche pamens d'uno bono imour que nous enlusissié la vido.

Nous quitè vitamen, davans qu'esclatèsse la guerro de quaranto; avié passa li setanto-cinq an...

Belèu que voulié pas soufri un carnage enca 'n cop?

Sa voues s'amoussè, mai soun souveni demoro dins ma memento. E de si raconte, vuei, vau assaja, en pescant au fin founs di remèmbe, de vous n'en dire quàuquis escapouloun.

Es-ti mestié d'apoundre que, lis aguènt ausi i'a mai de mié-siècle, lis ai teissu tourna 'mé li fiéu de moun cor. Aquéu pres-fa, clafi d'esmougudo, m'adraiè dins la lèio di countaire qu'aviéu, autre-tèms, negligido.

Pousquèsson mi raconte e li siéu vous esmòure un brisoun o vous forço esgaia!